


6 - 'U rivoggiu d'a Passioni

Testo e melodia registrati a Stefanaconi (CZ) nell'aprile 1982 dalla viva voce di Anna Moscato e di un gruppo di donne.

Recitativo



O Spiritu Santu miu, da - ti - mi
lu - mi, mu mi risbigghiu stu sensu 'nsensa -tu.

1.

O Spiritu santu miu, datimi aiuto,
mu mi risbigghju stu sensu 'nsensatu.

2.

Avi gra tempu chi su surdu e mutu,
di nuja vertu' mi nd'haju approfittatu.

3.

Cu l'aiutu di Dio su resalutu,
pe fari na cosa chi Dio l'ha secratu.

4.

E stu rivoggiu quantu nd'ha patutu,
sonau vintiquattr'uri e po e' spiratu.

5.

A li vintiquattr'uri ha dimandatu
di la so' cara Matri la licenza:

6.

"O cara Matre, lu temp'e' passatu,
avimu di fari l'urtima spartenzia".

7.

"Vui cu na Incia m'aviti minatu:
jeu restu morta affritta e di vui senza".

8.

Chija grandi muntagna non ci pensa,
si vota Cristu cu n'amuri pura.

9.

A li vintiquattr'uri nci ha crimenza,
Cristu faccia la cena in quella ura.

10.

Giustizia di notti 'mprima ura,
sutta specia di nostru pani redenturi.

11.

Si suttamisi cu nu veru amuri,
ora ca Juda lu volia sarvari.

12.

Juda c'avia lu cori tradituri,
ora Juda pinsava a li dinari.

13.

Pensamuci dolenti, o peccaturi,
Cristu non dassa modi chi non paga.

14.

A li tre uri Gesu' jiu adurari:
la passioni sua 'nci stavia accorta.

15.

Lu calaci e la cruci cosa amara,
lu Pataternu gia' lu vozi mortu.

16.

Lu Pataternu si mis'a pregari,
n'angialu mu nci manda pe' cumportu.

17.

A li quattr'uri Gesu' sta 'nta l'ortu:
la passioni sua pensava e bidia.

18.

Pensava all'agonia, gia' ch'era mortu,
sudava sangu e la terra abbondia.

19.

Chiju chi patiu, lu patiu pe tortu,
o peccaturi, lu patia pe ttia.

20.
 A li cinq'uri Gesu ' ca vidia
 lu Juda avanza e la turba a gridati.
 21.
 Juda nu baciù a li Giudei nc'icia:
 "Pigghjati a Cristu,ca l'haju mustratu".
 22.
 E li Giudei peccaru 'nquella via,
 quandu lu nomu di Jesu e' sbalisatu.
 23.
 Iju li guarda e mori di dolia
 pe 'paga mu nci dannu lu peccatu.
 24.
 A li se' uri Gesu' fu ligatu
 li mani d'arretu,e la turba s'affanna.
 25.
 Giacumu e Petru l'hannu abbandunatu,
 sen Gianni ca li seguita e non parra.
 26.
 Cu boffuli e catini strascinatu
 e fu levatu a lu palazzu d'Anna.
 27.
 E ja' e' statu di Malcu schiaffiggiatu,
 'mpacci sputatu e 'ntortu la cundanna.
 28.
 A li sett'uri la turba s'affanna,
 ca vonnu a Gesu' Cristu cundannatu.
 29.
 Grida la turba e Cristu 'nci cundanna,
 fu cundannatu a manu di Cafassu.
 30.
 Cafassu sti palori 'nci addimanda:
 "Tu non si giustu re,ca si re farsu;
 31.
 si re dal cielo e di nuja atra vanda,
 si re da morti",nci dissi Cafassu.

32.
 All'ott'uri non potia dunari un passu,
 ca j'era di la turba malatrattatu.
 33.
 Lu levaru nta na stalla stancu e lassu,
 di li capelli fu 'ndringuliatu.
 34.
 Scindiru li schiavi cu cori di sassu,
 cu l'unghi li so' carni hannu scarnatu.
 35.
 Iju li guarda cu lacrimi di 'mpassu,
 pe non aviri pieta' l'hannu abbindatu.
 36.
 A li nov'uri Gesu' fu negatu
 di l'amatu discipulu ch'avìa.
 37.
 Canta' lu gallu e Petru l'ha negatu,
 canta' lu gallu e Petru già' vidia.
 38.
 Cercau perdonu di lu so' peccatu,
 a li so' occhi du' cannali avìa.
 39.
 A li deci uri Gesu' non potia
 e fu levatu 'ncasa di Pilatu.
 40.
 Pilatu sti palori 'nci dicia:
 "Di 'Rodi aviti d'essari cundannatu".
 41.
 All'undici uri di 'Rodi fu portatu,
 e 'Rodi mu 'nci parra disìava.
 42.
 Cu na candida vesta fu pigghjatu,
 Gesu' Cristu di pacciu fu trattatu.
 43.
 Pacciu fu 'Rodi chi tantu ha pinsatu:
 na bianca vesta a la genti ha mustratu.

44.
E 'Rodi chi restau scumunicatu,
adessu chi Cristu ca non 'nci parrau.

45.
A li dudici uri la so' cara Matri avia arrivatu,
a Gesu' lo ritornanu a Pilatu.

46.
Mentri Pilatu sta cundanna 'nci arma:
"Nci damu na frusta e po' lu libaramu!"

47.
Prestu la frusta 'nci hannu preperatu,
cuminciaru di novi a battari li toni.

48.
Tantu chi l'hannu forti malatrattatu,
volenu mu lu spiccianu a nu jornu.

49.
La cara Matri di fora pregava,
pregava lu Pataternu pemmu torna.

50.
Pregava lu Pataternu pemmu torna,
mu campa ccani, no mu pati cchi'.

51.
S'affanna la turba in quelli giorni
pe fari na curuna di quelli spini.

52.
Crudi spini pungenti, a na dura culonna
fu 'nculonnatu a li quattordici uri.

53.
Mo si 'ndi parra di li quindici uri
pemmu si sapi lu quantu e lu comu.

54.
Pilatu ca s'affaciau di lu barcuni,
'nci lu mustrau a lu populu l'Ecciomu.

55.
E 'nci lu dissi a quelli genti crudi:
"Mo, si lu liberamu, fussi bonu?"

56.
Tutti gridaru: "A la cruci 'u Signuri!";
s'arza Pilatu e 'nci chiusi li toni.

57.
Ha perzu di la faccia lu decoru,
guarda a chi binni la grannipotenza.

58.
O 'Ternu Patri, chistu e' tuo Figliolu,
cum'e' ridottu a tanta penitenza.

59.
E' scrittu lu so' nomu in sidici uri,
e' cundannatu a morti: la sentenza.

60.
A li diciassetti uri ogni omu pensa:
"E chi duluri chija Matri avia!"

61.
Dassau lu Figghju a tanta penitenza,
levari la cruci 'ncoju (e) non potia.

62.
Di caminari si facia violenza,
milli voti ha cadutu pe la via.

63.
'Ntisi duluri la grannipotenza
quand'abbussaru e jettaru a Maria.

64.
E quandu a Munti Carvariu si jungiru,
a Gesu' lu 'nchianaru a strascinuni.

65.
E li soi vesti 'mbiscati l'avia,
nci li tiraru cu arrabbia e fururi.

66.
E li so' carni rinnovati avia,
pensava li fragelli cu duluri.

67.
La cara Matri 'nchiovare sentia:
fu postu 'n cruci a li diciott'uri.

68.
Arzamu l'occhi a li dicianovi uri,
di cori mu 'nd'amamu, o peccaturi.

69.
Cu n'amuri perfettu e amuri veru
'ndi vozi liberari di lu 'mpernu.

70.
"Patri, pirduna si crucifissuri,
ca su pacci e non hannu sentimentu".

71.
A li vinti uri fici testamentu:
a Giovanni la Matri sua lasciata avia.

72.
E li spiriti soi venia pirdendu
ed iju patari volia.

73.
Subitu dissi: "Siziu!". A nu momentu
feli ed acitu preparatu avia.

74.
E 'nci lu dezaru a Gesu' mbivendu,
e "Consumatum esti!" lu dicia.

75.
Si vota e vidi n'atra tirannia:
e nu Longinu na lanciata 'nci 'una.

76.
Pensamu lu doluri di Maria,
ca resta affritta, scunsulata e sula.

77.
S'abbattaru li petri di la via,
scurarru li stelli, lu sulu e la luna.

78.
Giuseppi d'Aramatea dissi a chija ura:
"O Nicodemu, chistu e' n'omu bonu!".

79.
'Nci tiraru li chiova e la curuna,
'nci lu levaru a Maria mortu di tuttu.

80.
E la Madonna era sula di cori,
e lo piangeva a piantu ruttu.

81.
Novi lanzola e nova siportura,
a li vintiquattr'uri fu 'nsipurcru.

82.
E mo' ch'e' dittu stu rivoggiu tuttu,
cumpatisciti si bistivi difettu.

83.
Chiju chi dissi lu dissi pe vutu,
ca non l'avia lejutu veru e certu.

84.
Cu ama lu Signuru veru e giustu,
lu paradisu lu pigghja di pettu.

85.
E cu 'mpeccatu staci e nun e' giustu,
vaci a lu 'mpernu e sapimulu di certu.

86.
Di lu celu cala' nu corpu santu,
cala' cu na campana 'ndolimentu.

87.
E quando s'arza lu calaci santu,
ladatu si lu santu sacramentu!

cfr. la raccolta di R. Lombardi Satriani
al n.4003 (Piscopio-CZ), al n.4004 (San
Costantino di Briatico-CZ), al n.4005
(Zambrone-CZ), al n.4006 (S. Giorgio Morgeto-RC),
al n.4007 (S. Leo di Briatico CZ)